

A TOTALIDADE DOS ONCE ESCRITORES GALEGOS QUE OBTIVERON O PREMIO NACIONAL DE LITERATURA PEDIMOS A DIMISIÓN DO CONSELLEIRO DE CULTURA DA XUNTA DE GALICIA

O señor conselleiro de Cultura da Xunta de Galicia vén de facer pública, e non por primeira vez, unha análise da cultura galega temeraria e negativa. Antes xa nos ten ofrecido a súa opinión de que “a cultura galega limita”, unha descualificación da nosa mesma identidade colectiva. Deberemos deixar de ter cultura propia, deixar de sermos galegos para non estar “limitados”? Como pode protexer e traballar a prol da nosa cultura quen se expresa con ese fondo complexo de inferioridade identitario? Non pode. Agora precisou máis o diagnóstico, a cultura galega está “ensimesmada e acomplexada”, expresión claramente ofensiva para os creadores e xestores da cultura de Galicia. Pero que, ademais, indica un descoñecemento claro do estado da nosa cultura, tanto no que atinxe ás obras como ao tecido industrial que as sustenta.

Os abaixo asinantes, autores de obras escritas todas elas en lingua galega que foron merecedoras do premio nacional de literatura nas súas distintas modalidades (narrativa, literatura dramática, literatura infantil e xuvenil, tradución e ensaio), consideramos que isto, coma as outras moitas distincións e consideracións que as obras da nosa cultura veñen tendo en toda España e fóra das fronteiras do Estado, negan a insultante e despectiva cualificación do señor Conselleiro.

Estamos verdadeiramente asombrados e fartos de que o conselleiro de cultura do goberno galego desprece sistematicamente a cultura galega, como un auténtico “bombeiro pirómano”.

Consecuentemente, para que desapareza esta pasmosa anomalía, pedimos a dimisión ou cese inmediato de don Roberto Varela como Conselleiro de Cultura do goberno de Galicia, dado que o seu escaso coñecemento e falta de consideración cara a cultura galega veñen evidenciar a nula idoneidade para o posto que ocupa. El ha ser máis feliz lonxe de todos nós, “limitados”, “ensimesmados” e “acomplexados”, e todos nós recuperaremos unha situación que teña un mínimo de cordura.

Alfredo Conde (Premio Nacional de Narrativa, 1985)

Paco Martín (Premio Nacional de Literatura Infantil y Juvenil, 1985)

Antón Santamarina (Premio Nacional de Traducción, 1988)

Xabier P. DoCampo (Premio Nacional de Literatura Infantil y Juvenil, 1995)

Manuel Rivas (Premio Nacional de Narrativa, 1996)

Fina Casalderrey (Premio Nacional de Literatura Infantil y Juvenil, 1996)

Manuel Lourenzo (Premio Nacional de Literatura Dramática, 1997)

Suso de Toro (Premio Nacional de Narrativa, 2003)

Rubén Ruibal (Premio Nacional de Literatura Dramática, 2007)

Agustín Fernández Paz (Premio Nacional de Literatura Infantil y Juvenil, 2008)

Xusto Beramendi (Premio Nacional de Ensayo, 2008)